

Washirika Pamoja na Kristo wa Utukufu Wake,

Tazama, huyu ndiye Mungu wetu, ndiye tuliyemngoja atusaidie ... Na tushangilie na kuufurahia wokovu wake. Isaya 25:9.

Yesu anakuja! Lakini si kwa ajili ya kusikiliza huzuni za wanadamu na kusikiliza mwenye dhambi aliye na hatia akikiri na kuungama dhambi zake, na kumtamkia msamaha; maana kesi ya kila mmoja itakuwa imekwisha amuliwa kwa ajili ya uzima au mauti. Wale walioishi katika dhambi watabaki kuwa wenye dhambi milele. Wale ambao wamekiri na kuungama dhambi zao kwa Yesu katika mahali patakatifu, wamemfanya Yeye kuwa rafiki yao na kuupenda ujio wake, watakuwa wameandikiwa msamaha kwa dhambi zao zote, na hali wakiwa wametakaswa mioyo yao "kwa kutii kweli," watabaki kuwa safi na watakatifu milele.

Yesu anakuja kama vile alivyopaa kwenda mbinguni, ila akiwa na utukufu zaidi. Anakuja na utukufu wa Baba Yake na malaika wote watakatifu, wakimsindikiza katika ujio Wake huo. Badala ya taji ya kikatili ya miiba kutoboa mwili Wake mtakatifu, taji inayong'aa utukufu itafunika paji la uso Wake mtakatifu. Hataonekana tena kama mtu wa huzuni nyingi ajuaye sikitiko; bali kipaji cha uso Wake kitang'aa zaidi ya mng'ao wa jua. Hatavaa vazi ambalo halikushonwa, bali vazi jeupe kama theluji linalong'aa kwa kumetameta.

Yesu anakuja! Lakini haji kutawala kama mtawala wa muda mfupi. Atawafufua wenye haki waliokufa, atawabadilisha wenye haki waliohai na kuwapa mwili usiopatwa na mauti na akiwa pamoja na watakatifu atautwaa ufalme wote chini ya mbingu. Ufalme huu utadumu milele. Kisha wale waliomngoja kwa saburi watabadilishwa na kufanana Naye.

Ikiwa malaika mmoja wa mbinguni alisababisha walinzi wa kirumi kuanguka kama waliokufa, itakuwaje kwa wale ambao hawajajiandaa, waovu, kuweza kumwona Yesu katika utukufu wa Baba Yake na malaika kumi elfu walioongozana naye na bado waendeleo kuwa hai. Watawezaje waovu kustahimili mwonekano huu! Wataililia miamba na milima iwaangukie ili iwafiche na uso Wake Yeye aliyeketi katika kiti cha enzi na ghadhabu ya Mwana -kondoo ...

Fanya maandalizi kwa bidii sana kwa ajili ya kukutana na Yesu, ili atakapoonekana uweze kushangilia kwa furaha "Tazama, huyu ndiye Mungu wetu, ndiye tuliyemngoja atusaidie." Hatimaye utakuwa umepata uzima wa milele, na utakuwa mshirika pamoja na Kristo wa utukufu Wake, daima utaisikia sauti yake takatifu ikithibitisha, tazama watu Wake wapendwa (Youth's Instructor, Aprili 1, 1854).

Hakuna hata mmoja ampendaye Yesu kwa dhati atakayesikitishwa na kuja kwake. Na wanapokaribia kuja Kwake Mwana wa Adamu, wale wampendao Yesu kwa dhati wanalitazamia tumaini kwa furaha na watajitahidi kuweka kila kitu tayari kumtazama yule ambaye nafsi zao zinampenda, aliyekufa ili kuwakomboa (Youth's Instructor, Aprili 1, 1854).